

**Uunga siunnersuut: Ruslandimut allanullu pillaatitit iliuusissanik atuutsitsilernissamut piginnaatitsissuteqarneq pillugu Inatsisartut inatsisaat**

(Naalakkersuisut Siulittaasuut)

**Saqqummiussissut**

(Naalakkersuisut Siulittaasuut)

**Siullermeerineq**

Siullermik Inatsisartut Siulittaasoqarfia, siunnersuutip matuma 2022-mi upernaakkut ataatsimiinnermi immikkut ittumik suliarineqarnissaa akuerimmagu, Naalakkersuisut Siulittaasuata qutsavigaa. Siunnersuut Ruslandimut pillaatitit iliuusissanik annertuunik atuutsitsilernissamut Naalakkersuisunut piginnaatitsisusaaq, aammalu Kalaallit Nunaannut annertooujussuarnik sunniuteqarsinnaasoq.

Ukioq manna ulloq 24. februaari Ruslandip inatsisinik unioqqutitsilluni Ukraine tiguarniarlugu saassuppa. Taamanikkulli nunarsuarmioqatigiit amerlanerpaartaasa tiguaaniarluni saassussineq assuaraat. Tamatuma malitsigisaanik EU-p (den Europæiske Unions) Ruslandimut pillaatitit iliuusissanik aammalu killilersuisunik iliuuseqarnissanik atuutsitsiartuaalernerat tunngavigalugu siunnersuut saqqummiunneqarpoq.

EU-miit Ruslandimut pillaatitit iliuusissat siulliit 2014-imiillit ingerlanneqalerput, Ruslandip qeqertaasaq Krim inatsisinik unioqqutitsilluni tiguarmagu qisuariaatit. Aammalu ukioq manna 24. februaarimiit EU, Ruslandimut pillaatitit iliuusissanut ataatsimoortukkaanut nutaanut tallimanut akuersissuteqarpoq. EU-mi pillaatitit iliuusissat ataatsimoortukkaat ilaatigut inunnut tunngatitanik pillaatitit iliuusissanik imaqarput; tassalu Ruslandip Europami niuerfimiinnisaaq annaassagaa; nukissiuuteqarnermut suliassaqaqarfiup aamma teknologiinut suliassaqaqarfiup iluanni avammut nioqquteqarnermut inerteqquteqalerneq; aammalu Ruslandimeersut pigisaasa nalillit EU-miittut mattunneqarnerat.

Pillaatitit iliuusissat EU-mi akuerineqartut, naalagaaffinnut EU-mi ilaasortaasunut toqqaannartumik atuupput, ilanngullugu Danmark. Kisianni Kalaallit Nunaat EU-mi ilaasortaannngimmat, pillaatitit iliuusissat taakkua atuutsinneqalernerat Kalaallit Nunaannut atuutinnngilaq imaluunniit pisussaaffiliinani.

Pillaatitit iliuusissat taakkua aamma Kalaallit Nunaannut atuutissasut pisussaaffiliissasullu kissaatigigutsigu, taakkua nammineerluta akuerisariaqarpagut. Taamaattumik siunnersuummi siunnersuutigineqarpoq Naalakkersuisut pillaatitit iliuusissat taamaattut, akuerineqareersimasut aammalu kingusinnerusukkat akuerineqartarumaattussat, akuerinissaannut piginnaatinneqassasut.

EU-p saniatigut aamma nunat allat arlallit Ruslandimut pillaatitut iliuusissanik atuutsitsilereerput. Nunat taakkua akornanni ilaapput USA, Canada, UK, Norge, Island aamma Savalimmiut.

Kalaallit Nunaata Ruslandip Ukraine-mut saassussinera assuarissagaa, nunatsinni maani politikkikkut atituumik isumaqatigiiffigineqarpoq. Taamaattumillu Kalaallit Nunaata EU-p aamma nunat allat arlallit Ruslandimut pillaatitut iliuusissanik atuutsitsilersimanerannut ilaalernissaa pissusissamisoorluinnarpoq.

Taamatut oqaaseqarlunga siunnersuut Inatsisartuni kajumittumik suliassanngortippara.